

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 096329 23 K
Visoko, 11.05.2023. godine

U IME FEDERACIJE BOSNE I HERCEGOVINE

Općinski sud u Visokom, po sudiji A. A. uz sudjelovanje zapisničara S. D., u krivičnom predmetu protiv optuženog D.A., zbog krivičnog djela nasilje u porodici iz člana 222. stav 1. Krivičnog zakona Federacije Bosne i Hercegovine, rješavajući po optužnici Kantonalnog tužilaštva-tužiteljstva Zeničko-dobojskog kantona broj T04 0 KT 0051485 22 od 09.02.2023. godine, na pretresu za izricanje krivično pravne sankcije održanom u prisustvu Kantonalnog tužitelja M. M., i optuženog D.A., dana 11.05.2023. godine donio je i javno objavio :

P R E S U D U

OPTUŽENI : **D. A.**, sin L. i majke S. rođene H., rođen godine u S., nastanjen u V. u mjestu O. bb, sa završenom osnovnom školom, nezaposlen, bez zanimanja, oženjen, otac dvoje djece,, državljanin BiH, JMB:, osuđivan,

Kriv je

što je :

dana 03.10.2022. godine, oko 14,00 sati, u V., u mjestu O., došao pred kuću svog oca D. L., te nasiljem i drskim ponašanjem ugrozio mir, tjelesnu cjelovitost i psihičko zdravlje člana svoje porodice, na način da je svog oca psovao, govorio pogrдне riječi, a zatim fizički nasrnuo na njega tako što ga je čekićem udario u desnu ruku nanijvši mu lahku tjelesnu povredu konstatovanu u JU Dom zdravlja V., a zatim istim predmetom razbio staklo na ulaznim vratima nastavljajući da prijeti riječima: „Jebat ću ti ja mater i tebi i policiji i ako zovneš policiju ubit ću te“, iako je bio svjestan da ovako bezobzirnim i drskim ponašanjem ugrožava spokojstvo i duševno zdravlje člana svoje porodice što je i htio,

dakle, nasiljem i drskim ponašanjem ugrozio mir, tjelesnu cjelovitost i psihičko zdravlje člana svoje porodice,

čime je počinio krivično djelo nasilje u porodici iz člana 222. stav 1. KZ F BiH

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH, izriče :

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 5 (pet) mjeseci, a koja se neće izvršiti ako optuženi za vrijeme od 1 (jedne) godine, od dana pravosnažnosti presude, ne počini novo krivično djelo.

Na osnovu člana 202. stav 4. ZKP FBiH, optuženi se oslobađa plaćanja troškova krivičnog postupka i isti padaju na teret sredstava suda.

Objazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T04 0 KT 0051485 22 od 09.02.2023. godine, optužilo je D.A., zbog krivičnog djela nasilje u porodici iz člana 222. stav 1. Krivičnog zakona Federacije Bosne i Hercegovine (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana 13.02.2023. godine. Na ročištu o izjašnjenju o krivnji dana 04.04.2023. godine optuženi D. A. je izjavio da nije kriv za krivično djelo koje mu se stavlja na teret, odnosno krivično djelo nasilje u porodici iz člana 222. stav 1. Krivičnog zakona Federacije Bosne i Hercegovine.

Na glavnom pretresu održanom 11.05.2023. godine, prije izvođenja dokaza, optuženi D. A. priznao je krivnju za krivično djelo koje mu se stavlja na teret, odnosno krivično djelo nasilje u porodici iz člana 222. stav 1. Krivičnog zakona Federacije Bosne i Hercegovine, a njegovo priznanje je prema ocjeni ovog suda u saglasnosti sa dokazima u koje je sud izvršio uvid i to : zapisnik o saslušanju svjedoka - oštećeni D. L., sin R. iz V., O. - Č. bb, uvid i čitanje - zapisnik o uviđaju PS V. broj: 08-02-09/1-265/22 od 03.10.2022. godine,- Rješenje Općinskog suda u V. broj: 41 0 Pr 094707 22 Pr od 04.10.2022. godine,- specijalistički nalaz JU Dom zdravlja V. na ime D. L. od 03.10.2022. godine, - fotodokumentacija PS V. broj: 08-02-09/1-265/22 sa datumom fotografisanja 03.10.2022. godine,- izvod iz kaznene evidencije MUP Kantona S. za osumnjičenog D.A. od 14.11.2022. godine.

Optuženi je u svom iskazu prilikom priznanja krivnje izjavio da mijenja izjavu o krivnji, i da se danas na glavnom pretresu izjašnjava da je kriv. U svom iskazu istakao je da se kaje zbog počinjenog, kao i da mu je otac preminuo nedavno i da se prije njegove smrti izmirio sa njim, te da se se u budućnosti ovakvi i slični događaji neće ponavljati, moli sud da mu se izrekne najblaža moguća sankcija, i da ga se oslobodi plaćanja troškova postupka jer je lošeg imovnog stanja.

Sud je ovo priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u saglasnosti sa materijalnim dokazima, naprijed navedenim, u koje je sud izvršio uvid, na osnovu čega van svake sumnje proističe da je optuženi ostvario sva bitna obilježja bića krivičnih djela koja mu se stavlja na teret, odnosno : krivično djelo nasilje u porodici iz člana 222. stav 1. Krivičnog zakona Federacije Bosne i Hercegovine.

Sud zaključuje da je optuženi navedeno krivično djelo počinio sa direktnim umišljajem, jer je bio svjestan svog djela i htio njegovo izvršenje, a sud u toku postupka nije posumnjao da na strani optuženog postoje okolnosti koje bi dovele u pitanje uračunljivost optuženog, jer iz predloženih dokaza ne proizilazi sumnja da optuženi nije bio u mogućnosti da shvati značaj svojih djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela koje mu se stavlja na teret.

Prilikom izricanja krivično pravne sankcije sud je cijenio optuženom D.A. kao olakšavajuće okolnosti činjenicu da je priznao izvršenje krivičnih djela koja mu se stavlja na teret, čime je u mnogome doprinio utvrđivanju činjeničnog stanja i skraćanju krivičnog postupka, kao i okolnosti koje je optuženi naveo u svom iskazu prilikom priznanja krivnje. Dok je od otežavajućih okolnosti sud uzeo u obzir samu prirodu i vrstu krivičnog djela koje mu se stavlja na teret, kao i činjenicu da je ranije osuđivan za druga krivična djela. Cijeneći utvrđene okolnosti na strani optuženog, sud je optuženom D.A., za navedeno krivično djelo izrekao kaznu zatvora u trajanju od 5 (pet) mjeseci, a koja se neće izvršiti ako optuženi za vrijeme od 1 (jedne) godine, od dana pravosnažnosti presude, ne počini novo krivično djelo. Po mišljenju ovog suda izrečena sankcija srazmjerna je stepenu odgovornosti optuženog i težini počinjenih

krivičnih djela koja mu se stavljaju na teret, te će se istom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Na osnovu člana 202. stav 4. Zakona o krivičnom postupku Federacije Bosne i Hercegovine (Službene novine FBiH broj 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13, 59/14 i 74/20), sud je oslobodio optuženog plaćanja troškova krivičnog postupka i isti padaju na teret budžetskih sredstava.

Sudija
A.A.

PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.